

駐

粵

八

旗

志

駐粵八旗志卷二十一目錄

人物志

京職外任文職武職列傳

舒康

承泰以上京職

朱霽

徐榮

屈廣培

劉建中

劉華

王雙喜
鍾贊韶

朱朝玠父霽弟朝綱

劉承緣

徐慮善

薛炳

馮文全

王璘

弟珮

孫玉叢以上外任文職

富德

常恩

穆 格 得 倫

全 泰 來 存

崑 芳 舒 和

徐懷仁 徐懷瑞

倪秀仁 侯建祁

章世忠 施 溥

田 英 以上外任武職

光緒十年續修外任文職列傳

陳良玉

駐粵八旗志卷二十一

舒康字子安滿洲正白旗人少落魄防禦承聯愛其才勸使就學由是發憤讀書登咸豐壬子繙譯榜進士分禮部厯派儀制司精膳司司務廳滿檔房漢本房學習期滿派祠祭司司務廳主稿漢本房總辦清文總校補主事以才練保送河工

召見發往南河時金陵未復大帥檄命防堵蔣壩分剿盱眙營叛卒及高郵湖西賊黨咸豐十一年敘績以同知直隸州補用未幾署泰州知州遽卒在禮部時貧無僕馬遇值五鼓赴

圓明園抱文書持燭籠往返四十里率以爲常云

承泰字魯巖滿洲正白旗人咸豐壬子

恩科繙譯進士戶部主事滿檔房主稿因公落職未幾開復同治十二年以

大婚禮成

賞加五品頂戴卒於京

以上京職

朱霽字經畚漢軍鑲白旗人嘉慶丙子科舉人湖北南漳縣知縣縣居萬山中毗連郢蜀地瘠而民樸霽視事坐堂皇以訟來者爲判曲直不用鞭撻民各輸服不半載訟事遂稀邑例歲納狐皮充貢其後地墾日增獸跡絕少輒購諸他處以代民以爲苦乃力請大府遂

奏免之出俸錢收橡子芋種以備荒修黌舍建麗材書院以勸學在任五年卒邑民喧傳爲本邑城隍之神事雖不經其實惠在民可知已

徐榮原名鑑字容庵小字鐵保後改今名號鐵孫漢軍正黃旗人七歲塾師命賦梅花詩應聲立就弱冠補諸生兼習騎射嘉慶丙子舉於鄉時南海曾釗熊景星譚瑩番禺林伯桐黃子高嘉應吳蘭修方共爲古學一見榮皆傾心下之儀徵阮太傅元督粵以十臺詩課士得榮作大爲稱賞特開學海堂以榮及諸人分課諸生經史詩賦一時文風遂推極盛未幾選直隸藁城訓導丙申成進士

殿試二甲以知縣籤分浙江署遂昌嘉興等縣有治績補臨安知縣二十一年擢玉環廳同知二十六年署温州府招降海盜莊通姜扁鵲等二百餘人是年擢知紹興府時境內盜風甚熾榮抵任爲方略捕楊三九何秋二等數十人置之法盜遂熄二十九年夏霖雨連月淹沒禾稼榮請帑賑卹災民開三江閘壩以宣洩水患修石土塘一萬四千九十餘丈上虞三百九十餘丈疏閘外達北入海江路沙淤掘西漚硬沙十餘里自是水患始平咸豐三年調杭州府兼護理杭嘉湖道粵賊已陷金陵五月圍南昌浙中震動臨安昌化於潛民趙四喜

等潛起煽亂榮領兵往剿滅之復往吳江平望常山開化布置要害以防賊南北入浙之路四年賊犯徽州陷祁門巡撫黃宗漢檄榮領兵赴威平督辦徽防至則於徽州箬嶺開塹增設天心洞防卒僞爲賊檄激怒徽民徽民皆助兵殺賊七月敗賊於樺根嶺賊遁去安徽巡撫福濟

奏浙兵追賊出江宜阨蕪湖大通口勿遽返浙八月十五日奉浙撫檄遂統兵出樺根嶺二十五日克復建德縣城九月初二日克復東流縣城初十四日追及賊於堯渡於東流連戰大破之殺賊三千餘人尸壅河水爲不流十一月移駐祁門浙撫

馬耳人方示 卷二十一
以餉饋難濟檄撤兵安徽學使沈祖懋

奏留

詔如所請五年正月二十七日賊由石埭之琉璃霧露兩
嶺分竄羊棧嶺入據黟縣城副將周天綬敗走榮
聞警馳赴漁亭堵禦飛函學使暨徽甯道速兵來
援遂與賊連戰二日賊衆大集援兵未至榮奮身
率麾下力戰遂歿於陣尸返浙境奉

簡汀漳龍道之命事

聞得

旨飭部從優議卹部議照正三品例

賞祭葬銀兩

賞騎都尉世職以恩騎尉世襲罔替其妾伍氏投繯殉節

照例

旌表又於漁亭建立專祠旋入祀杭州紹興名宦祠初葬杭之湖庄徽人請移塋歛之北鄉以其後奉祀焉榮博聞彊記資性絕人經史而外天文地輿百家衆技以及釋典道藏之書無不精究而尤留心經濟生平廉介自將晚歲服膺明儒呂新吾劉念臺之書期於躬行實踐所著懷古田舍詩鈔四十卷兼新城秀水之長爲乾嘉後一大宗喜畫梅有梅統四卷刊行於世餘尙有大戴禮補註日新要錄金石萃編補遺并跋若干卷藏於家

屈廣培號因齋漢軍正紅旗人嘉慶戊寅

恩科舉人選曲周縣教諭携一少子赴任精醫理課士之暇偶爲人治疾前後活人甚衆爲詩好陸放翁年老告歸卒於家子瑞今官防禦

劉建中字伯裕漢軍正白旗人道光壬午舉人性孝友與物無忤屢赴禮闈不第選順德府訓導履任四年以父老告歸父卒服闋友人官楚北邀之偕往後返里次長沙粵寇猝至巡撫駱秉章故人也留偕員弁守城解嚴後欲保以職力辭加國子監助教銜以歸大學士官文爲副都統時建中居幕中相得甚懽及督湖廣頗有書來招之弗往未

幾卒年五十四子錫麟官兩淮鹽場大使

劉華字實卿漢軍正黃旗人性誠篤與兄芳同道
光辛巳

恩科舉人選直隸東光縣訓導携一子赴任未至卒於蘭
谿王雙喜字鐵華漢軍鑲白旗人甲午科舉人鍾
贊韶字華墀漢軍正藍旗人乙未科舉人雙喜贊
韶之妹婿也二人皆有文名皆大挑二等雙喜選
高邑縣教諭行次常州病卒贊韶選蠡縣教諭行
次饒州病卒亦可異也贊韶恂恂儒者居家友愛
先世遺產無多爲其弟耗散俱盡贊韶無怨色授
徒餬口猶時供給之其卒也人尤惋惜焉

朱朝玠字介石霽兄子父鬻篤行力學潛心經傳
舉道光丙戌進士以知縣籤掣貴州未至卒於途
朝玠弱冠補諸生有文譽爲順德何惠羣庶常高
足弟子吳縣陳鍾麟觀察桂林陳繼昌太守先後
來粵主講咸賞識之道光丙申

恩科進士辛丑之役承平日久人不知兵乃自請於將軍
管理防城礮械布置井井乙巳選授甘肅文縣知
縣未幾題調昌吉再調奇臺遷迪化州知州咸豐
壬子助餉

賞戴花翎乙卯陞獲銅鉛礦并倡捐開採奉

旨以道員用兩攝鎮迪道事將入都遘疾遽卒年四十九

在任時止携一僕民有不能耕作及磽田不熟者捐俸補完其課同鄉有謫戍到甘者爲料理生計死則殯斂爲之返柩泊其卒旁無親屬有遇赦謫軍陳於當事願護其喪以歸生平尤工詞曲在甘數年嘗作詞以牡丹花葉作牋遙寄同里故人亦佳話也弟朝綱庚子武舉廣東撫標右哨千總捐陞遊擊未補用卒

劉承緣字福田號荔壇漢軍正白旗人協領劉贊次子也有文名年十八取入郡庠贊時年老致仕家居貧甚賴承緣授徒以供甘旨由廩生領道光己亥科鄉薦咸豐甲寅紅匪事起偕八旗紳士請

於將軍團練餘丁一千以勦戰守事平敘功以知縣用戊午選授廣西融縣知縣旋調署昭平縣時巡撫勞崇光奉

命署兩廣總督以承緣生長廣州諳悉洋務遂

奏調回東而洋兵尙屯省垣議者多謂制軍宜駐節肇慶不宜遽到省垣承緣乃自請先返廣州察視情形既畢乃急迎至梧州以爲制軍不到會城卽示以怯且愈生疑忌諸事更多掣肘力勸進省崇光從之自洋人退城後庫項支絀八旗所領餉米不足生計窘甚乃特請於崇光復設團練旗丁五百巡防街道每名月給口糧銀二兩又請派旗兵

千餘名晝夜巡防城上每名日給口糧銀六分滿漢之家賴此舉火者甚衆而防守亦甚得效焉後進策於崇光令富戶出財承充各行釐商以助軍饟從之同治元年以充商事被議革職後數年署巡撫郭松燾以其前有招撫粵西股匪功爲開復原官未幾卒生平居家孝友待諸弟姪皆有恩子健以軍功保知縣發廣西用

徐慮善字伯安榮長子也諸生候選訓導榮督辦徽防慮善隨侍榮戰漁亭陣亡慮善仍領練兵防勦保州判捐陞同知時副都御史張芾駐兵徽州檄調總理營務咸豐六年隨隊收復婺源總理提

督鄧紹良令以千五百人移軍廣德州以爲浙西聲援賊來距雙橋十餘里紹良率全隊出留慮善守營賊衆萬人更番血戰我軍不能支慮善列檣槍扼橋上潰卒有過橋者轟擊之卒駭反身走賊衆不知所爲亦退紹良乘勢奮擊追殺十餘里大勝而歸未旬日克復甯國奉

旨以知府用並

賞戴花翎是時粵垣爲洋兵所踞

上命順天府尹黃宗漢總督兩粵兼

欽差大臣道經浙江慮善以服闋至杭州

奏調隨往和議成復返浙浙撫羅遵殿檄命總辦漕

米海運抵津門甫一月漕米一律完兌奉

旨以道員陞用十年七月委署處州府未赴改署金華府
金華尙未收復而杭城繼亦失陷疆吏死難

上擢左宗棠爲巡撫由廣信統兵入慮善迎謁開化宗棠
以慮善名父之子一見甚懽遂委署台州府知府
時郡兵民相關糜爛甚於金華辭不願往復命返
金華糾集士民助官兵慮善以艱於籌餉又辭巡
撫心弗善也逾年始劾其失落印信罷歸數年卒
於家慮善敢任事負材氣遇權力勝己者必駕其
上以是多爲上官激賞亦屢受同列擠排而愛才
重士能傾心下之頗有父風焉

薛炳字彪如一字星橋漢軍鑲白旗人年二十一由附生領道光丁酉科鄉薦甲辰大挑一等以知縣分發江蘇在籍候咨咸豐三年到江蘇奉調赴金陵大營旋署荆溪縣知縣兼權宜興縣事四年丁父憂奉調赴上海軍營以前在荆溪團練保陞直隸州知州復捐陞知府浙撫何桂清聞其才檄赴浙江清理棚民遂

奏請留浙補用六年丁繼母憂請假回籍葬親八年服闋赴浙委辦海運局及常山糧臺又委管帶礮船克復松江敘績以道員用同治二年隨前浙撫左宗棠勦辦大營克復嚴州卽委署嚴州府事時

新遭蹂躪城內居民僅十餘家廨宇焚燬隸卒無
一人炳與一僕炊爨住一破屋每晨赴大營往返
數十里屍骸狼籍滿地雪中路滑馬蹶被傷不數
日遂卒炳外渾厚而內精明處事能忍辱耐勞必
得當而後已在荆溪時縣東鄙有土猾倚寨恃勢
藏匿姦宄刦掠商民前令無如之何炳下車微服
往說之卽呈繳牌劄散其徒黨子維鈞今諸生

馮文全字成甫漢軍正白旗人道光己亥科舉人
惠州守海廷琛聞其名延課其子廷琛以事返關
中關中同氛正熾沿路盜賊出沒邀與俱文全慨
然諾之適座主右副都御史涇陽張文毅芾在籍

團練遂留主家事文毅被害身後事一切井井焉天性真率友人醵貲愆恤援例以知縣分發湖北非其志也抵鄂數年未及補用卒子端丁卯舉人王璘字慕吳漢軍正白旗人道光己亥科舉人性簡默寡交游與弟珮同居怡怡年六十餘貌若四五十人同治辛未赴禮闈不第大挑一等以知縣分發廣西壬申委署昭平縣事政務簡靜百姓安之甲戌序補雒容未抵任卒於桂林珮字紉蘭亦庚子舉人一試禮闈卽不出後璘一歲卒

孫玉叢字東珏漢軍正黃旗人道光壬辰科舉人咸豐十年以知縣揀發貴州委署修文縣事兵燹

後公私掃地爲之籌糧撫卹乞免釐穀等稅課流
亡稍復同治三年卒王叢性曠達畫山水宗王原
祁尤精音律箏師笛客常滿座間云

以上外
任文職

富德滿洲正藍旗人乾隆二十一年由本旗三甲
喇牛衆章京來粵擢水師營協領先是本營每歲
令繪艍船各一往虎門之纜尾停步兩河口協防
又令槳船輪流赴佛山陳村一帶巡察其駕駛水
手皆虎門大鵬廣海綠營水師兵爲之旗營兵僅
司槍礮火器富德乃令各兵一律學習駕駛不數
年兵皆練熟衝濤駕險無不如志二十七年

簡放乍浦副都統

常恩滿洲正黃旗人乾隆五十九年任正黃正紅旗滿洲協領性方嚴訓練兵丁動必以禮時旗人昏喪祭祀有染漢習者嚴禁之掌理將軍印務庶政咸令得宜簡要不煩歷任賢之兩膺卓薦嘉慶十三年陞授河南城守尉時三省教匪甫平餘孽紛竄大河東北抵任後領隊扼守衛輝一帶捕獲甚衆河北遂以安謐後四載以疾卒於官

穆格滿洲正白旗人由善撲營專達從征大金川以奪碉功

賞五品頂戴花翎凱旋後游陞佐領乾隆二十二年征回部準噶爾有戰功三十年陞補廣州駐防鑲黃正

白旗協領政務之暇輒赴前鋒營與諸士卒講肄武藝問答必以

國語兩旗人有親喪必親往弔賻或問之曰兩旗同一家彼之父母卽吾之伯叔父母也可不弔乎四
十一年

簡放熊岳副都統去任之日兩旗兵丁如失所恃惜其後政績無從紀載焉

得倫滿洲鑲藍旗人由前鋒擢本旗驍騎校遷正黃旗防禦保舉綠營都司道光六年選授山西高山城都司校閱兵士見陣法未能整齊乃自出戰法繪成陣圖親爲訓練作止進退遂大改觀巡撫

按視營伍及高山城大稱獎之以水土不服回旗
優游里中數年而卒

全泰滿洲正黃旗人由前鋒游擢至正黃正紅旗
協領道光二十一年洋人突入省河晝夜乘城防
守領兵出戰奉

旨賞戴花翎咸豐二年以軍政薦舉卓異四年

擢授涼州副都統後卒於任

來存字松亭滿洲鑲黃旗人姿貌瓌異擅騎射年
甫二十餘卽由前鋒補驍騎校不十年擢任鑲白
正藍旗滿洲協領咸豐甲寅土寇事起附城東北
路一帶無處非賊而何六一股由石龍墟集衆數

萬先撲省城將軍穆特恩命來存偕漢軍協領王
鎮雄統領旗兵駐守北門外永康礮臺六七月閒
賊來犯礮臺屢挫之其後以攻作守大小四十八
戰無不身先士卒是年十一月遂掃盪賊巢肅清
北路五年四月撤兵入城凡在礮臺一年誠其子
毋白家事唯數日遣人一問其母起居而已將軍
與總督據實保

奏奉

旨賞加副都統銜並

賞戴花翎六年

簡放乍浦副都統七月將赴任復奉

自留署廣州漢軍副都統是年九月因軍務復統帶滿漢官兵駐守保極礮臺七年交卸漢軍副都統事務將軍與總督仍奏留帶兵守臺十一月十三十四日洋人奮力攻擊省垣及永康臺巨礮如怒雷轟擊來存兩晝夜露處臺上督兵戰守礮丸紛紛穿兩旁過以千百計無纖毫傷洋人用遠鏡視之詫以爲神焉九年八月軍務大定入都

陛見調杭州副都統十二月抵任十年二月賊陷杭州力守內城與賊晝夜相持賊不能破三月江南援師至與將軍瑞昌督兵出城合戰遂克復杭城

賞頭品頂戴並加喀爾麟阿巴圖魯名號積勞成疾是年

八月卒於官年四十八

上聞深爲憫惜照一品大員軍營立功後病故例優卹廕一子以驍騎校用來存性質厚與人一以誠守永康臺時與協領王鎮雄同心協力絕不爭功競名別出意見故一往奏功及賊陷杭城內城地僅一隅兵不過數千而能抗賊數萬其智勇亦殊出尋常焉

崑芳滿洲正紅旗人數歲父卒嫡母生母持齋禮佛崑芳亦持齋禮佛及長膂力過人能掇六百觔石中道光甲辰

恩科武舉爲督標右營右哨千總咸豐五年勦番禺沙灣

馬身人放示 卷二十一
三
菱塘等處土匪六年奉調隨征廣西陣亡時年三十七

贈守禦所千總賞卹銀三百兩雲騎尉世襲恩騎尉罔替
御賜祭葬銀三百兩入祀府城昭忠祠

舒和字達行協領九思子少承家訓儒雅能文通
達政體乾隆四十三年由印務筆帖式改補正藍
旗驍騎校充印務章京一切章奏文移咸經其手
將軍存泰甚器之乾隆戊申霪雨連月兵房坍塌
甚多和援案請借帑給修分年按餉扣還請將軍
具

奏奉

旨允行嘉慶二年擢鑲白正藍旗協領會駐防旗人許在
本省應文童試和與滿洲協領廣德議滿漢各立
義學延師教授八旗子弟由是文風蒸蒸日上六
年陞授河間協副將總督顏檢以其才調督標中
軍副將遇事輒與參決一時藩臬皆莫能及焉後
以疾乞解任南歸家居養病時與山人衲子輩往
還唱和閒畫山水花卉以自娛號趣園老人著有
燕游襍記趣園詩集若干卷藏於家

徐懷仁字純圃漢軍鑲紅旗人與弟懷瑞同丙子
科武舉道光十一年陞補四會營千總分防廣甯
城千總廣甯與廣西懷集縣接境商船來往者屢

馬身人放云 卷二十一
遭劫掠比官兵往捕賊已逃匿林箐險阻無可如何及官兵退還城邑又復潛出劫掠懷仁乃偵知賊匿某處密帶營兵入夜疾行七十餘里至圍捕之得十一人皆賊魁也自是盜風稍息後以疾乞休卒於家

徐懷瑞字瑾堂由武舉考列一等以千總歸督標補用隨剿排徭敘功

賞戴藍翎充督轅巡捕官道光十三年補增城右營千總
游陞潮州鎮中營守備二十一年陞署廣州城守
中軍都司辛丑之役以守城功

賞換花翎捐陞遊擊未幾以疾乞休卒懷瑞目鷹視而性

仁恕僅一子嘗夏日宴客一卒持瓦壺注沸湯泡茶其子從廳後趨出撞壺壺破湯瀉滿身潰爛遂殤卒自縛請死諸客皆請治之懷瑞嘆曰余命也卒何罪釋之後卒無子以兄子植嗣今諸生

倪秀仁字良信漢軍正藍旗人嘉慶丙子科武舉由廣協頭司把總擢博羅城守千總土匪金剛仔羅亞仙搶掠民村與官兵相抗屢捕弗獲秀仁抵任數月齊行捕獲遂調署陸路提標中軍守備歷署前營守備道光二十一年與洋人戰於烏涌槍傷左股陞三江協守備調三水營守備未幾以傷病復發告病卒於家

侯建祁漢軍鑲白旗人驍騎校侯文畧子嘉慶己卯科武舉兩廣督標後營千總咸豐元年於賀縣之半路墟勦賊陣亡奉

旨加等照守禦所千總例賜卹給雲騎尉世職襲次完時以恩騎尉世襲因替建祁性伉爽能撫士卒特以不工趨承落落營伍中殆三十年死時年幾六十云子武生連科襲連科卒孫汝樑襲

章世忠字盡臣漢軍正黃旗人性孝友軀幹雄偉道光乙酉科武舉以千總歸督標委用十年隨征排穽敘功

賞戴藍翎後爲兵部廣東提塘凡八年推陞漕衛守備告

歸年五十餘始得一子析其產之半以千金置田
爲通族祭祀烝嘗之用焉

施溥字澤民漢軍正黃旗人水師協領施雄量子
道光戊子武舉丙申會試成進士以守備在旗候
選辛丑海氛不靖在事有功

賞戴藍翎選山東撫標右營守備咸豐三年賊陷金陵隨
叅將嵩瑞領兵赴援安徽巡撫周天爵調屬麾下
克復定遠無爲桐城敘功遞陞兩廣督標後營叅
將

賞換花翎七年抵任調署惠州協副將粵西賊犯西江總
督勞崇光調赴防堵巨賊陳金剛等嘯聚信宜縣

城與粵西賊相鈎連勢張甚同治二年

奏署高州鎮總兵官五月提督崑壽至賊黨殺陳金剛以降十月同任明年金陵餘孽分竄江閩一帶總督命統惠標七營赴鎮平嘉應堵禦敘前高州功題補督標中軍副將加總兵陞銜同治四年抵任七年調署黃岡協副將十二年調署香山協副將卒於任

田英漢軍正黃旗人道光戊子科武舉道光十七年補撫標左營千總調陸路提標千總二十一年防城得力以守備陞用旋署增城營守備調清遠營守備二十三年陞瓊州鎮左營守備二十六年

以卓異保陞都司兼署右營都司咸豐二年陞署
瓊州鎮中營遊擊事務五年兵部推陞雲南大理
營都司未赴任卒卒之日家無餘財云

以上外
任武職

光緒十年續修補外任文職傳

陳良玉字朗山一字鐵禪漢軍鑲白旗人寶長子少嗜學工詩善填詞弱冠補博士弟子員爲詩卽見賞於徐榮道光丁酉舉於鄉名益起父沒後家綦貧乃課徒以養母嘗館新甯令李延福署中有因事囑其居閒者許以千金不應署中人目爲迂夫子延福聞而益重之道光甲辰大挑二等咸豐九年金陵賊竄陷南安分擾惠州之河源龍川時廣西按察使東莞張敬修在籍奉檄往防剿延良玉襄戎幕事平請以知縣用同治元年選授通州學正抵任後兼理海運累保

賞加同知銜以知縣陞用後儘先補用直隸州知州旋丁母憂回籍服闋將赴部瀕行足疾大作乃止家居爲學海堂學長又爲同文館總教習好獎借後輩才俊博覽羣書留心經濟尤善談文字友人以文字相質能指其瑕疵直言無所隱粵中名流多與之遊光緒元年將軍長善開局修駐粵八旗志樊封草創粗具而卒良玉與劉彥明繼樊封爲總纂加以討論修飾雜記故蹟皆其手筆也著有梅窩詩鈔二卷詞鈔一卷皆已刊行七年九月卒年六十七

駐粵八旗志卷二十二目錄

人物志

忠義列傳

承志

廣生廣倫

來順冬順

劉國祥

江倫

崔國瑞

黃國仁

黃世良

莫清吉

劉建綸

榮齡 常勝 孫湛 李培青 朱朝暉 王金玉

尹樹廷

羅文福

董沛釗

楊堯

白世璋

楊靖

馬啟微

紀世槐

紀秉滙

馮文耀

馬方
潘正錦

韓懋

劉鑑

劉安

劉方

懿行列傳

蘇養布

明揚

固呢齊

劉自德

鍾世澤

鍾廷槐

鄧宣

徐振遠

孔紹綸

席懷珍

董興仁

高鵬

李明達

蘇承霖

左逢春

白嵩福

賈至喜

賈至良

武連壽

唐建中

樊恒齡

朱廷光

劉承緒

崔岱

崔湛

劉劼

劉勲

談森

談建基

王文魁

許學灝

劉景兆

章世增

劉景芳

馮經

王瓚

高殷臣

張玉良

劉忠

陳寶

李湛培

許世興

蕭茂清

郭殿卿

薛廷楓

郭魁

王國佐

郭霖

曹鉞

王建言

劉瑞

高誠

周文亮

張啟佐

駐粵八旗志卷二十二

忠義列傳

謹按

國朝史例職官顯秩凡有事跡及功業可傳者雖授命捐軀皆自爲列傳不入義烈傳中惟茲士卒旣奮力於戎行復捐生於鋒鏑人雖微末而勇烈堪嘉不可不類爲之傳其無事跡可採者則著見於表云

承志滿洲鑲藍旗人少孤讀書習繙譯土寇事起當事者以其文弱令司巡邏而承志奮然請充前隊牛欄崗之戰遇伏陣亡時年甫二十餘士林爲

悼惜焉

廣生廣倫滿洲正紅旗人二人同母兄弟廣生甲
兵廣倫副甲兵咸豐四年土寇之亂廣生兄弟同
進攻賊巢廣倫額中傷猶裹創力戰復被槍傷遂
亡廣生大哭曰兄弟出師中折其一卽生歸何以
見母挺戈直前連殺數賊遂被擒賊奇其貌欲降
之廣生大罵賊怒支解之時年二十八廣倫二十
三又滿洲鑲黃旗來順冬順兄弟也來順前鋒營
前鋒冬順甲兵兄弟二人是日同時力戰陣亡
劉國祥漢軍正黃旗人有材略善醫術康熙四十
一年連州排搖倡亂以官醫隨征會天大霧進兵

遇伏官兵傷亡殆半國祥亦陣亡有麥文忠者漢軍正白旗人以拳勇槍棒著稱亦同歿於陣

江倫漢軍正白旗人乾隆二十一年以甲兵從征臺灣奮勇爭先小半天之戰倫偕死士八人挺矛陷陣殺賊頗衆賊怒攢戟叢刺倫被殲焉

崔國璠漢軍鑲白旗人馬甲道光辛丑海疆事起選習放大礮者十餘人於鳳凰崗礮臺守禦國璠與焉洋艘自烏涌入國璠然巨礮碎其頭梳繼而輪船環攻臺陷遂被害尸經數日面如生又黃國仁正藍旗水師兵隨左翼佐領呃守泥城西岸閏三月晦日輪船來攻國仁方換舵猝爲礮丸所中

同時戰歿有王佐源倪秀苗劉之茂余啟泰劉錦源劉明七人皆水師兵

黃世良漢軍正黃旗人協領黃世藩弟年十八入武庠道光辛丑之役世良以水師兵守東城大礮皆已裝火藥經數日世良恐受潮溼欲挖出曬之擊撞生火轟出爲所傷立亡時年二十三妻王氏守節撫孤奉

旨建坊子國鼎同治甲子科武舉今官鑲藍旗防禦

莫清吉漢軍鑲藍旗人甲兵道光辛丑之役洋人踞永康臺攻城清吉防守北城左臂猝中槍傷猶往來城堞調催軍火副都統裕瑞見而壯之保奏

奉

旨賞六品藍翎咸豐四年紅巾之亂在事出力拔委署驍騎校七年洋人闌入省垣登陴苦戰左頰中鉛丸未幾傷亡

劉建綸字經甫國子監助教建中季弟性勤敏初習舉業後改繙譯試兼通

國書考補隨印外郎爲副都統烏蘭泰所賞識咸豐元年烏蘭泰奉

命勦廣西髮逆帶往專司摺奏及文案等件甚爲倚任建綸自以旗僕世荷

國恩僅橐筆從戎不足爲武遂於進兵時潛偕滿洲

叟什哈榮齡常勝漢軍叟什哈孫湛李培青朱朝
桓王金玉出戰五月初十日破賊於獨鼇山大有
斬獲七人奮勇深入爲賊大股所圍同日力竭陣
亡烏蘭泰悼惜甚至七人年皆二十餘

尹樹廷漢軍正白旗人水師領催咸豐甲寅之役
賊將偪大城樹廷糾合營中奮勇之士七十餘人
歃血爲克敵會每戰當先未嘗小敗七月二日牛
欄崗之戰猝遇伏賊援軍不繼全隊戰歿生者僅
數人而已

羅文福漢軍鑲紅旗人水師領催身材雄偉拳勇
勝人紅巾賊陳開李文茂等屯踞蕭崗排日分股

攻撲省城我軍亦排日出敵七月二日我軍追賊至牛欄崗伏賊四起文福身被多傷遂歿於陣董沛釗漢軍鑲藍旗人咸豐四年以水師兵隨大軍北郊搜剿逆匪疊受多傷彌加奮勇八年奉調隨同廣協千總梁仕光往收德慶州紅巾餘孽追奔至白沙嘴遇伏陣亡

楊堯漢軍正紅旗人領催咸豐四年紅匪之亂七月戰於棠夏賊三伏田塍先以殘卒誘我軍及戰酣伏賊四起我軍斷爲三四堯與防禦王國聰同戰歿於谷口雙溪下後從祀昭忠祠

白世璋漢軍正白旗人馬甲父常祿庠生訓蒙數

十年卒後世璋偕其兄世球竭力養母咸豐四年七月初二日與兄隨防禦王國聰攻北郊賊巢至棠夏遇伏力戰時許死傷接踵乃呼其兄先退自殿後且戰且却從閒道遂歸而其兄退二里又遇伏賊戰亡事平後差操之暇兼營生計以贍寡嫂及姪女二人又以一子嗣其兄七年十一月十四日洋人登城取火槍鉛藥別母忿然出戰倏中槍子洞腹倒地昇歸翌日卒

楊靖漢軍正紅旗人父文顯從征臺灣積功擢驍騎校靖習繙譯由隨印外郎補領催咸豐四年土寇事起靖守永康臺七月初二日出隊將進搗賊

巢其長子朝生適來省父亦隨出戰至棠夏遇伏
父子俱陣亡有馬啟微者漢軍鑲黃旗人聘靖女
未婚同時戰歿靖女聞之曰父盡忠兄盡孝我雖
女子獨不當盡節耶乃自縊其家人救之復蘇遂
截髮自誓守貞不嫁云

紀世槐漢軍鑲紅旗人領催驍勇戰必居先土寇
事起殺賊甚多賞七品頂戴左臂槍傷未復次年
洋人闖入省垣世槐禦敵戰逾兩時疊被槍傷陣
亡紀秉漚者世槐之從叔父通六壬課方事迫時
秉漚占之曰外攘多凶寓內安貞訂不十旬旭日
重明因謂人曰可勿慮也適登城樓觀戰洋人發

炬矢棟折藥櫃火發遽卒後事解悉如所占

馮文耀字星垣漢軍正白旗人湖北候補知縣文全仲兄精繙譯爲八旗義學清書教習門下士登科第者甚衆七年省垣失陷文耀麾衆赴敵爲鉛子所中軍人負之以歸家人延醫治之叱曰城亡與亡之謂何遂弗治傷潰而卒子濬辛未科繙譯進士健甲戌科進士分發浙江卽用知縣光緒二年其弟子以文耀與韓國彬合祀於祠

潘正錦漢軍鑲白旗人馬甲略知書能明大義篤信因果有爲不善者盡誠誠導之必其人改而後已里有少年某素憚正錦一日衷刃赴其儕約途

遇正錦正錦怪其狀詰何往少年不敢隱具以實對正錦挾之返告以利害遂弗往是夜其人戕殺一家數命而某初不知以爲但邀其佐鬪也土寇事起選兵備勦正錦時充佐領外郎未與選力請之當事者慨然許之每戰必先七月二日戰棠夏村深入遂歿於陣韓懋鑲白旗武生水師副工兵性直慇喜談忠義同時亦力戰歿正錦第三子文鐸同治辛未科繙譯進士工部主事改選知縣劉鑑漢軍正紅旗人咸豐甲寅土匪事起鑑年六十餘已辭退馬甲六月二十四日軍方結隊出鑑不告家人潛身隨隊出戰陣亡家人求其屍弗得

次年夏有馬四者於山僻松樹下睹一屍植立視其首戴竹笠有鑑名歸告其子子急往視之果父也撫屍慟絕瞬息閒膚革全化白骨委地而已

劉安漢軍正白旗人性聰穎十歲父教以鳥槍法土寇事起安年十七方讀書義學手槍白父願隨出戰父奇其志許之每擊賊一發輒中隊官某見之曰兒不歸讀書而擊賊得毋欲學終軍乎棠夏之戰歿於陣有劉方者協領劉贊孫慙猛無賴喜鬪人呼之曰神獒然性孝當與人鬪時聞母聲卽止每戰必居前列賊望而避是日遇伏大呼揮刃盪擊殺數十人歿於陣

懿行列傳

蘇賽布滿洲鑲藍旗人甲兵性方正以父母卒後終鮮兄弟遂絕意名利不與世接所居以磚塞其門出入則踰短垣領餉日備一月糧食差操之外未嘗一見其人也年八十餘卒卒之日其子始拆門治喪焉

明揚滿洲鑲紅旗人領催性至孝母病私嘗其糞而甘乃虔禱於神潛剗臂肉雜湯藥以進母卒哀毀不欲生生平好施與年八十遇

恩詔給九品頂戴越數年而卒

固呢齊滿洲鑲白旗人甲兵性純樸少喪父母依

其姊夫姊夫綦貧家口亦衆齊不校錙銖與同甘
苦年三十始有室爲協領郭齊哈值宿不能施帳
人怪而問之則詭詞答之曰人皆不肯飽羸羸何
得而生也戚友中富貴者遠避之貧乏者周卹之
生平趨事必先遇清明重九節必走父母墓拜謁
哭泣年六十餘卒一子令讀書不求名利云

劉自德漢軍正黃旗人少孤事母盡孝母病思食
鶴羹自德多方覓之不獲一日有一鶴降於庭自
德取烹以奉母病遂瘳人以爲孝感所致

鍾世澤漢軍正藍旗人領催性至孝乾隆七年父
廷枋疾視湯藥寢食俱廢父卒哀號不欲生暨殮

繞棺一慟而絕其家先有鍾廷槐者水師驍騎校
雍正六年母張氏病膈醫藥罔効廷槐禱於神割
股雜羹肉以進母遂能食未幾愈後先孝行萃於
一門云

鄧宣字文翁漢軍鑲白旗人性廉靜其妻協領李
承宗女也有富商設典肆於旗地晚宣言於承宗
出諭帖禁止騷擾因許以賂宣笑曰吾豈倚婦翁
求富者哉卒不爲通

徐振遠漢軍正黃旗人父行好道喜遊名山生振
遠甫彌月卽出門雲遊不返及壯學營販家漸充
給或有自羅浮歸者言一遇之振遠聞卽往凡三

往卒不遇乃盡散家財周給貧乏年四十餘遂生子鑑後改名榮有傳

孔紹倫漢軍正藍旗人隨征臺灣充哨探馬軍凡戰日軍前一大白旗書免死字植之崗上賊衆有投械來奔其下者收隊時引之以待傳訊給降民腰牌遣散之時或昏暮不及訊則置諸營後軍人狡詐有欲邀功者陰縱之使潛逃已則大呼曰降賊脫逃因追而斬之提級報功此軍營常事也紹倫睹之駭然曰此與謀殺良民何異其後有此類者輒執之鳴於隊長前後保全無算子忠錫官水師左翼佐領孫符椿今防禦符鉞今驍騎校

席懷珍漢軍正黃旗人性仁恕嘗五鼓早起開門一里人逐盜至其門盜倉皇奔入匿房內衣架後懷珍陽爲弗見里人去乃喚盜出戒以後勿復爲予金令營生理遣之盜感謝而去後除夕前一日入市買物遇一人趨前致揖邀赴酒樓言先與公同里仰慕名德連斟勸飲大醉而歸入門則度歲貨物色色俱備心訝之不解何故元旦早起則前日邀飲者衣冠入拜伏地不起懷珍掖之問何由見愛如此其人曰某卽往年匿衣架後之人也蒙公賜改行從善隨人貿易幸致小康感公大德不能忘耳由是往來如戚懷珍有五女嫁貲皆其人

備辦云又董興仁者漢軍鑲紅旗人除夕有偷兒潛入其室伏榻下興仁見之隱不言賽神畢列酒饌於堂牽偷兒出命坐告之曰吾觀汝狀殊不惡何乃爲此今夕除夕吾與汝先盍醉飽吾囊尙有一金可將去爲小生活後勿復再偷兒感謝而去高鵬漢軍正白旗人性誠慤課徒家塾卒年九十餘每見子弟必引先正格言教之習儉曰儉於飲食可祛疾病儉於嗜慾可延壽命儉於言語可寡尤悔儉於酬應可絕是非協頌高明章曰此保生四箴也揭其語於兩翼官學之壁

李明達漢軍鑲白旗人性孝友事母能先意承志

其弟某將嫁女奩具無所出又不欲累其兄明達知之乃貸人百金携歸謂弟曰某甲前十餘年貸我百金久不償今忽見歸我無所用弟將去購辦粧奩可也其弟信以爲然遂得藏事

蘇承霖漢軍正白旗人領催精繙譯漢軍副都統達春延課其子甚禮重之會驍騎校缺出達言其才於將軍且力薦之將軍諾之矣及期承霖稱病不出人呼之爲蘇顛云

左逢春漢軍正黃旗人領催操行端方每遇公事上官諮訪之逢春盡言無隱且處事精詳以是人皆敬服之每見本旗子弟服飾有漸忘本色者必

面斥之俟其改而後已遇挑選衆兵期執各人履歷牌子面叩其履歷並家口年甲稍有脫誤必誠之曰此已身切事尙弗能記憶其平日爲人不問可知矣其愛人以德類如此長子瑞嘉慶己卯武舉次子璋三子璠諸生孫秉桓補行乙卯科繙譯舉人秉堦甲戌科繙譯進士秉隆候補州判

白嵩福字品五漢軍正白旗人嘉慶庚申駐防旗人許應本省童試嵩福受知於學使首取進郡庠設塾里中督課最嚴生徒撲責不少貸以是有白老虎之稱然所教弟子皆經書精熟矣年七十餘卒子常亨癸卯科舉人孫世淑壬戌

恩科繙譯舉人

賈至喜字克仁漢軍正黃旗人植品力學臺灣之役奉派從征其仲弟至恩強勇有力以兄體羸願代往上官謂爾兄熟習文案吾令往勦理營務非令衝敵也至恩固請上官憐其義並令隨往甫至大營至恩感疾遽卒買棺瘞淺土及凱旋運以歸上官以至喜在事勤勞將薦之力辭願將至恩名糧補其季弟至良以資養贍許之年逾七十道光元年

覃恩賞九品頂戴

賈至良字克忠至喜季弟少孤兄弟四人事母盡

孝至良好讀書兼精

國語家貧課讀自給時尙未有科舉之學至良教人
唯教經書大義及立身行己之道一言一動皆有
禮法當道重之向有左右翼官學總教習專課

國書及是遂特聘至良在左右翼官學批改繙譯專
課經書文藝凡官員子弟八旗俊秀皆往就學一
時彬彬質有其文焉所居旁有隙地種竹構亭暇
則招諸名流觴詠其閒所爲詩多不自收拾其卒
門生送葬者數百人至今八旗數教習之最賢者
無不曰賈先生孫宗溥繙譯生曾孫培業光緒乙
亥

恩科舉人

武連壽漢軍正紅旗人家貧爲餅肆傭得甘旨以養母母素奉大士甚虔忽患危疾命連壽凌晨赴粵秀山萬善寺祈禱至山門拾一袂頗沈重將啟視所得忽一少年踉蹌至汗流被面徧地尋覓壽問之曰母病垂危告貸至戚得衣物數事五鼓時經過山下因念此閒大士極靈冀求得神方母病或瘳比至山門未啟少憩門外忽聆寺鐘急遽入禱獲一吉籤喜而急歸忘其所携至家始覺急尋至此今不見獲計唯投厓殉母耳壽詢其數相符遂舉以還之少年感謝而去因入寺祈禱得一籤

曰一劑四物湯溫服毋太速見利不昧良上天錫之福壽駭然日報應有如是之速乎服之果瘥其子榮瑞貢生以學行聞

唐建中字立山漢軍鑲黃旗人諸生爲人司筆札嘗歲暮市筆筆店買者紛集建中坐旁有一裹巾未知誰氏物已而客散建中得筆亦去店主人呼之曰君手巾物何忘之也建中茫然携歸視之則白鑑一封有達成行兌收字知爲人遺失次晨持返則早有一客向店主詢詰建中前問所失物相合卽舉以還之客細詢名姓居址而去數日有具衣冠厚弊來見者則行之主翁游姓也感其高誼

延課其子歲奉五百金焉

樊恒齡漢軍鑲黃旗人少給事將軍署將軍某出一珊瑚重十餘兩命匠琢頂珠數事閤人持付匠人二人相誤墜地作數段閤人謂匠人墜地匠人謂閤人墜地所值甚鉅旁人不敢加一語也恒齡慨然曰此非二人所能償也乃白將軍自認墜地泥首請罪將軍怒然無如之何遂解後將軍知之乃益愛重之有某令求向將軍關說署某大縣許以重賂恒齡駭然曰吾儕小人何敢干預外事以速重咎况受重賂乎不可其兄某爲協領頗傷嚴急一日佯醉登其門大詬曰奈何欲激生事端貽

累宗門乎其兄聞之爲稍霽威云子振鰲乙未

恩科武舉

朱廷光漢軍鑲白旗人少孤家貧傭工以養母後以營運漸至富分卹宗黨無少吝嘗於道拾遺金數百兩坐俟失主詢明付還不受謝而去生三子督課甚嚴街道有頽壞者購石悉易之東郊外東山寺圯首捐五百金落成寺僧請諸檀越赴齋以捐貲多少爲坐次廷光布衣草履獨據首席衆皆驚歎年八十餘卒子孫科甲鼎盛人以爲好善樂施之報云

劉承緒字守菴漢軍正白旗人幼孤祖母與母俱

藉女紅給食及長通滿漢文並騎射乾隆五十二年以馬甲隨征臺灣凱還因足疾辭退名糧將軍閔之以其弟充補俾資養贍未幾疾愈或勸其再出挑選不難得官承緒以爲貪且疑於詐遂專力貨殖營什一之利因時消息素饒材智又委任得人不十年家遂饒裕戚友賴其力者甚衆居家嚴肅子孫旁侍未嘗有情容精書畫喜與文士往還携其子入都鄉試因以遊覽山川風土晚年與友人數爲雅會酒酣倚笛歌元人雜劇有承平時前輩風流云其子弟孫曾補諸生者二十餘人領鄉薦者四人後贈奉直大夫子劼勲皆有傳

崔岱字倚雲漢軍正白旗人父崇發多隱德岱其長子也性純孝父歿卽矢志戒殺茹素與弟湛相友愛老而彌篤爲本旗清書教習弟子多荷栽培成家貧而好周人急有親死無以爲殮者竭力助之子姪皆教以義方卒年七十子廣文嘉慶己卯科舉人有傳

崔湛字桂庭岱同母弟也父歿與兄岱以毀瘠聞每忌日必泣事兄恭謹晨昏必省候與人交無疾言遽色尤與本旗劉景兆交最篤景兆爲官學清書教習湛漢學教習同處一堂凡二十四年以道義相切磋及景兆病革易簣時湛往訣別執其手

絮語移晷家人環泣其側弗顧也卒年七十餘子
三廣慶廣祥道光辛卯同科舉人廣善諸生孫炎
丙子舉人內閣中書廣祥另有傳

劉劼字獻臣承緒長子也郡增生少敦學行局度
端嚴有聲黌序閒道光壬午鄉試以額滿見遺父
卒有弟七人尙多幼弱乃操理家業盡心教養無
嫡庶一體相待咸俾成立勲勁嘉劼功皆列郡庠
今其家五世同居門以內五六十口雍雍如也遭
母喪營葬居白雲山中事畢得疾歸遽卒年五十
子彥揚壬戌

恩科舉人內閣中書銜彥明甲子科舉人孫俊丁卯科舉

人儼僕倬諸生

劉勲字鼎臣劼同母弟恂恂儒者弱冠補諸生屢試弗售中年代兄理家政事必請命於兄乃行友愛諸弟情意深厚晚年篤信因果力行善事鄉里稱善人焉子彥昌有傳

談森字良材漢軍鑲白旗人委驍騎校腰圍數尺胸懷坦易遇人喜笑人無老少咸愛之好推解戚友有窮乏者必多方欣助雖饘粥弗給弗卹也生平未嘗一皺眉曰貧富有命何爲自戚戚年七十餘卒

談建基字肇齋森長子也家貧專心苦學兼通滿

漢文字爲將軍印務處主稿及司理右司度支數
十年事經其手無不周當又爛於例案八旗長官
有事就訪必盡誠相告性孝友父疾篤禱於神願
終身戒殺茹素以延父命父疾果愈每晨誦經躬
自灑埽門內外無纖塵隣里化之巷路皆整潔焉
偶一日聞道旁破屋內兒哭甚哀異之呼兒出年
甫十一二問何哀曰父死無以爲食母欲改適勸
弗從故悲耳建基曰汝能謀食乎曰能曰汝能謀
食足以供母乎曰能建基因呼兒偕歸出數千錢
予之兒自是日販果物稍得贏餘母子藉以存活
其他善事多類此年七十餘卒子廣楠今協領廣

慶壬戌

恩科繙譯進士揀發奉天知縣廣佩戊辰繙譯進士孫國政癸酉舉人

王文魁漢軍鑲黃旗人領催水師佐領文耀之弟尙氣好勝不畏強禦遇不平事無干己者必挺身出人亦憚其強弗敢與校與人爭時聲若巨霆然一聞兄至卽俯首旁立寂然無聲櫥房書寫蕭士選謂人曰見王四之粗暴令人生厭見其強直令人生畏至聞其庭幃恭謹則令人生敬也人以爲知言

許學灝漢軍鑲黃旗人其友楊某以四百金付其

收藏其妻子不知也閱數載楊某病歿身後事一切學灝躬爲料理旣殯取金置諸前而告之曰爾銖積寸累付我收藏若聞喪日持還爾子費殆盡矣茲除所費具存如許原帖並存庶無欺隱座客皆嗟歎

劉景兆字雨田漢軍正白旗人家貧苦學精通

國書爲本旗官學教習二十餘年方伯吉某聞其名延訓其子數年日必相見有夤緣者求爲汲引皆不應晚年復爲左翼官學教習管學官某偶閱所課生徒文意有未愜取筆點竄景兆聞之弗悅遽託疾以歸年七十餘卒長子建中壬午舉人國子

監助教銜直隸順德府訓導少子建綸陣亡皆有傳次子建德辛卯舉人湖北候補道

章世增字廷績漢軍正黃旗人精鳥槍法能於數百步外發鉛丸中船桅中年業鰥家頗饒裕宗族寒苦者時相周卹子女孤者爲完其婚嫁卒年六十餘生五子長子振錦諸生振銛廩生振銑振鏹武生振銛尤有文名早卒

劉景芳漢軍正紅旗人有至性父疾視湯藥衣不解帶居喪盡禮隨征臺灣凱旋至澎湖遇颶風船閣碰石上桅折艙破水入沒脛景芳哀號籲天同舟六十餘人遇救得免人以爲誠孝之報

馮經漢軍正白旗人領催掌本旗檔案有印官驍
暴馭兵苛虐經遇事調護人甚德之其友某奉檄
赴柳州購馬私捫馬價百餘金以市洋貨欲以博
奇贏至爲奸僧所賺盡喪所領經聞之謀爲補償
數甫足而某早懼罪自戕經卽以其銀代還諸官
王瓚字獻廷漢軍鑲黃旗人諸生家貧授徒自給
友人陳燦亦諸生家染時疫醫藥無資瓚以所得
脩金傾囊與之爲之前煎藥調護燦家數口遂賴以
痊其師蘇桐谷歿子不振瓚屢周卹之又嘗聯義
會以賑窮乏弟子安如潤七八歲五經徧讀背誦
如流其家無力遣就讀瓚不受脩脯力爲督課十

二歲遂以默寫十三經補入郡庠晚年好覽方書
時爲人治疾善攝氣導養之術年八十餘卒子鎮
畿咸豐四年出戰北郊陣亡

高殿臣號大愚漢軍正白旗人有古風好讀書吟
詠與徐榮輩相唱和淡名利專力於醫品學稱最
每曉夜應診雖勞弗恤遇無力者必贈資藥所活
人無算書用中鋒有骨力妙風神訂方人多寶之
非但瘳病也自名其堂曰養古春齋可想其人焉
著有林泉詩草脈訣珍藏經驗奇方年八十餘乃
卒子仁諸生能文早歿平舉人堂諸生今官協領
孫綬蘭諸生晉蘭舉人冠蘭增生現官驍騎校

張玉良字匠成漢軍正紅旗人言語動止皆有禮
法喜談舊事與人言娓娓不倦掌漢軍副都統書
記廿餘年未嘗有一差失婚喪嫁娶一守舊法外
人時有訕謗玉良聞之不顧也子五人半列膠庠
劉忠字元理漢軍正黃旗人天性誠慤安貧樂道
掌檔房文案二十餘年共稱辦事可法課徒里中
教人必令先讀孝經謂人知孝自然事事循規蹈
矩嘗以高祖國祥醫術濟世遇貧人卽解囊代贈
藥物所著有字體詳辨一卷養正良規二卷孝經
啟蒙二卷醫學要錄四卷年七十餘長子吉亨歲
貢生次謙亨例貢生孫學源增生學江附生

陳寶字鳴和漢軍鑲白旗人嘉慶中初建八旗義學擇子弟聰穎者入讀寶與其選師甚優異之後以父令挑補錢糧師欲挽留不能得年十七父卒與弟貴各勤職業貴由武舉歷擢至正藍旗佐領寶爲領催嫻滿漢文工射掌檔房稿務所管兵丁有疾苦力爲周卹性伉直與上官議事有不合必侃侃力爭晚年好覽醫術寄情於酒卒年五十二子良玉道光丁酉科舉人順天通州學正

李湛培字增春漢軍鑲白旗人性質直重然諾處事不憚勞苦早歲充副都統叻什哈非其好也免去設錢肆以營生計戚友以急乏求貸者意弗忍

拒與之未嘗取息久之本亦不歸而湛培所稱貸於人者則棄產償之坐是大困然未嘗絲毫妄干人家居事母晨夕必躬視起居及病便溲亦躬親奉持中衣必躬親浣濯事諸兄恂恂未嘗有乖忤色雖號爲士大夫者內行有弗逮也好方書手自抄撮閒爲藥以濟人年八十貌如五六十同治十三年卒

許世興字敏中學灝長子性簡樸篤於內行少屢應童試不售充將軍印務外郎遇事能勞留心掌故凡兵防之沿革官員之政績案牘之原委類有籍記在印務五十餘年先後章京皆就諮訪尤好

引掖後進卒年七十餘長子標庚戌繙譯進士少
子樟諸生孫普濟甲戌會魁工部主事改用知縣
普威諸生

蕭茂清漢軍鑲藍旗人幼喪母事父朝陞晨起執
炊俟父飯畢卽入市賣漿日得錢百數十以給養
父雙目失明醫藥無貲每日早起以舌舐父目數
月後障翳漸開未幾復故由是孝養彌篤父年至
七十有九茂清咸豐元年

賈恩錫九品頂戴至八十八而終又郭殿卿亦鑲藍旗人
其母患背癰痛不可忍晝夜呼號殿卿寢食俱廢
聞人言得膿出痛當稍減殿卿吮之痛果少減連

吮數日痛減去大半遂能進飲食其膿腥穢殊甚
旁觀欲嘔而殿卿不覺也半載後母病始愈至八
十餘乃卒

薛廷楓字蔭軒漢軍鑲白旗人諸生事母至孝鄉
試屆期以母病不赴躬侍湯藥事長兄敬畏至老
不衰隣有詬誶者必相戒曰幸勿爲薛先生所聞
也晚年兼通醫學年六十卒子煥諸生亦工醫

郭魁漢軍鑲白旗人性廉介義不妄取入市買物
不論值人亦不忍欺寡言笑未嘗有惰容橫逆之
來第忍受之不怒於色亦不匿於心善步射精鳥
槍法子弟來學者無不盡心教之差操勤慎數十

年如一日遠近咸稱長者年七十餘卒子廣德咸豐四年陣亡

王國佐漢軍鑲白旗人有膽氣而好行善晚年常携一竹筐於路拾字紙歸焚之咸豐八年於拱宸坊遇二洋兵欲探其筐不與拔劍以脅之國佐厲聲曰此字紙耳我豈懼死者耶擲其筐於地兵驚愕而去子世裕辛酉武舉

郭霖漢軍鑲藍旗人母朱氏撫孤守節霖事母孝其友番禺林某病篤以其妻子爲託霖諾之歸以白母及林卒招其妻子至一潔室居之時假母命周卹焉友妻故有色屢以游語挑之霖正色輒避

去友妻亦愧悔專意撫孤而霖年甫二十五遽卒
無子其妻柳氏守節奉姑兩世皆建坊

旌表云

曹鉞漢軍鑲黃旗人馬甲家貧事寡母不離膝下
晨起必詣母所叩謁起居母往戚家則向母寢床
叩謁一日甚雨屋漏母不能寢呼匠葺屋匠昂其
值不能給乃自完掇梯登屋失足墮階傷脇至死
戀母呼不絕云

王建言漢軍鑲紅旗人通和溫雅不類武人徐榮
時爲孝廉在籍甚器之妻以甥女家本寬裕以好
施予漸窘乏而奉母備極孝養待寡姊尤厚篤好

青烏家言母卒親營葬地晚年納妾生一子名直
今諸生

劉瑞漢軍鑲黃旗人武生姿貌瓌偉父朝輔工

國書善籌算由官學生充補馬甲爲將軍印務外郎
以勤能著稱瑞年甫冠卽以騎射顯充將軍叅叶
哈爲人機警有智略道光辛丑海疆事起旗兵水
陸接戰瑞在事奮勇賞給六品頂戴補委驍騎校
旋遭親喪其子紹基擢鑲白旗驍騎校遂絕意進
取驍騎校署旁有隙地瑞出已貲構屋數楹前後
院落雜植花竹以爲憩閒之所誠其子紹基他日
去任此屋必歸本旗作爲官學膏火之用後其子

陞任一遵父命焉

高誠字子貞漢軍正紅旗諸生協領高明章之孫也通滿漢文先屢試文闈弗售後奉文改試繙譯年屆六旬將軍穆特恩憫其皓首窮經不情青雲之志且家口衆多並無錢糧遂拔補礮兵俾資養贍嗣因土匪滋擾幫同團練事平挑補步甲平生所得意者不過如此性孝友常以教讀脩脯及所得餉糈分贍繼母與弟己雖枵腹弗顧也卒之日室如懸磬門人爲之料理焉

周文亮字子信漢軍鑲白旗人諸生性孝友家貧課徒以養母母卒葬日悲號氣絕踰時乃蘇撫孤

姪過於其子生徒貧寒者不取束脩且供其紙筆
與人交始終如一生平未嘗作謊語銷聲匿迹足
不出里巷當世士大夫無一知之者年五十餘卒
張啟佐漢軍正黃旗人附生家饒於財咸豐四年
六月中紅匪事起聲勢張甚旗紳倡議捐輸稟請
將軍團練餘丁一千名啟佐首先捐銀一百兩由
是有力之家陸續捐助焉子正紀壬戌

恩科繙譯進士湖南新甯縣知縣

駐粵八旗志卷二十二終